

- राजस्थान दिवस रा सिलसिला मांय राख्या जा रह्या राज्य स्तर रा कार्यक्रमों रा तैत बीकानेर मांय किसान सम्मेलन राख्यी ज्यो—मुख्यमंत्री भजनलाल शर्मा किसानों रा भला सारु केई ऐलाण कीना।
- राज्यपाल हरिभाऊ बागडे गाय, किसान अर प्रकृति संरक्षण सारु सगळों कानी ऊं मिल र काम करण री जरूरत माथे जोर दीनो।
- विधानसभा अध्यक्ष वासुदेव देवनानी राज्य स्तर री विकसित भारत युवा संसद मांय कह्यो— देश रो भविष्य नौजवानों रा मजबूत कंधों माथे।
- राज्य मांय गर्मी रा असर मांय लगातार बधोतरी—आवता 48 घंटों मांय कठे—कठे मौसम मांय बदलाव रा आसार।

000

राजस्थान दिवस रा सिलसिला मांय प्रदेश मांय राख्या जा रह्या न्यारा—न्यारा कार्यक्रमों री कड़ी मांय आज बीकानेर मांय किसान सम्मेलन राख्यी ज्यो। इण मांय मुख्यमंत्री भजनलाल शर्मा प्रधानमंत्री किसान सम्मान निधि ऊं दी जावण वाळी रकम मांय बधोतरी अर मुख्यमंत्री थार सीमा क्षेत्र विकास कार्यक्रम समेत किसानों रा भला रा केई ऐलाण कीना। वे मंगला पशु बीमा योजना रो दायरो बधावण अर ढांढा—ढोरां रा स्वास्थ्य सारु मुफ्त दवाइयां अर टीकां री तादाद 138 ऊं बधा र 200 करण रो ऐलाण ई कीनो। प्राकृतिक खेती ने बधावो देवण सारु बळदां ऊं खेती करण ने बधावो देवण री योजना समेत पॉली हाउस, सौर पम्प, खेती—बाड़ी रा काम मांय आवण वाळा साज—ओ—सामान, कांदा रा भंडारण अर मधुमक्खी पालन ऊं जुड़ी 12 योजनावां ई चलायी ज्यी। कार्यक्रम मांय मुख्यमंत्री 30 हजार किसानों ने 137 करोड़ रुपया री सब्सिडी री रकम ई खातां मांय भेजी। श्री शर्मा न्यारी—न्यारी सरकारी योजनावां रो फायदो लेवण वाळा किसानों ने मदद री रकम रा चैक ई दीना। ई मौके वे कह्यो के किसानों रा पूरा कल्याण सारु सरकार भांत—भांत री योजनावां चला रही है।

राज्य स्तर रा ई जळसा रो न्यारा—न्यारा जिलां मांय राख्यी ज्यो जिला स्तर रा किसान सम्मेलनों मांय सीधो बतायी ज्यो। मुख्यमंत्री इण ऊं पैली किसान उत्पादक संगठन—एफपीओ मेळा अर प्रदर्शनी रो उद्घाटन कीनो। वे न्यारा—न्यारा जिलां मांय काश्तकारों ऊं वर्चुअल तरीका ऊं बातचीत ई कीनी। राज्य स्तर रा कार्यक्रमों री कड़ी मांय काल भरतपुर मांय गरीब अर अंत्योदय समारोह राख्यो जावेला। 28 मार्च ने भीलवाड़ा मांय सुशासन समारोह अर 29 मार्च ने कोटा मांय युवा अर रोजगार उत्सव व्हेला। राजस्थान दिवस रे मौके 30 मार्च ने जयपुर मांय जोरदार जळसो अर 31 मार्च ने निवेश उत्सव राख्यो जावेला। राजस्थान दिवस महोत्सव री कड़ी मांय नई दिल्ली रा बीकानेर हाउस मांय काल नौ दिन रो राजस्थान उत्सव सरु व्ह्यो। मुख्यमंत्री भजन लाल शर्मा आज इण रो विधिवत उद्घाटन करेला। इण मांय राजीविका क्राफ्ट मेळो अर फूड उत्सव राख्यो जा रह्यो है।

000

राज्यपाल हरिभाऊ बागडे गोबर ने खाद रा तौर ऊं काम ले र बिना रसायन खेती करण ने बधावो देवण बाबत् कह्यो है। वे आज जयपुर मांय राष्ट्रीय किसान अर गौ—पालक सम्मेलन मांय बोल रह्या हा। श्री बागडे राज्य मांय उपलब्ध देशी गाय रा दूध ने खास बताता थकां गौ—धन ने बचावण सारु गौ शालावां ऊं जुड्या अर दूजा कामों री सराहवणा कीनी। राज्यपाल देशी तकनीकां ने बधावो देवण किसानों रा उत्पादों रा प्रमाणन अर ब्रांडिंग सारु ई काम करण बाबत् कह्यो। वे गाय, किसान अर कुदरत ने बचावण सारु सगळा ऊं मिल र काम करण री जरूरत बतायी। राज्यपाल आज बीकानेर मांय महाराजा गंगासिंह विश्वविद्यालय रा नौ वां दीक्षात समारोह मांय ई शिरकत कीनी। ई मौके वे विकसित भारत बणावण सारु मिल र काम करण बाबत् कह्यो। राज्यपाल परीक्षा मांय अव्वल रह्या विद्यार्थियों ने सोना रा तमगा अर डिग्रियां दे र नवाजा। ई मौके श्री बागडे कह्यो के तालीम हासिल करण वाळां ने देश बणावण मांय तालीम काम लेवणी चाहिए।

000

पशुपालन मंत्री जोराराम कुमावत आज पाली रा एक दिन रा दौरा सारु पधार्या। वे सर्किट हाउस मांय जन सुणवाई कर र अहलकारों ने जनता री परेशानियां आगी करण रा हुकम दीना। श्री कुमावत खबरनवीसां सागे बातचीत करता थकां कह्यो के राज्य सरकार पशुओं रा कल्याण सारु गौ—पालक

कार्ड योजना ई चलाई है, जिण रे जरिये पशुपालकां ने एक लाख रुपया ताई रो कर्ज बिना ब्याज मुहैया करायो जा रह्यो है। वे बतायो के विभाग राज्य मांय सेक्स सोर्टेड सीमन री प्रयोगशाला सुरू कीनी है, जिण ऊं दूध देवण वाळा ढांढां री तादाद मांय बधोतरी व्हेला।

000

विधानसभा अध्यक्ष वासुदेव देवनानी कह्यो है के नौजवानां रा मज़बूत कंधां माथे देश रो भविष्य है। वे आज विधानसभा मांय राष्ट्र मण्डल संसदीय संघ री राजस्थान शाखा री ओर ऊं राखी ज्यी राज्य स्तर री **विकसित भारत युवा संसद** मांय बोल रह्या हा। श्री देवनानी कह्यो के भारत रो संविधान देश री ताकत रो केन्द्र है अर इण री हिफाजत सगळां री ज़िम्मेदारी है। वे विकसित भारत बणावण सारू संविधान रे अनुसार चालण री ज़रूरत माथे ज़ोर दीनो। प्रदेश रा सगळा ज़िलां मांय राखी ज्यो युवा संसद कार्यक्रम मांय चुणी ज्यो 140 जणा राज्य स्तर री युवा संसद मांय विचार बताया। इण मांय चुण्यी ज्यो तीन बेहतरीन प्रतिभागियां ने राष्ट्रीय युवा संसद मांय शिरकत करण रो मौको मिलेला।

000

सरकार भारतीय साइबर अपराध समन्वय केंद्र री रपट पाछे एक हजार 410 गेमिंग साइटां ब्लॉक कर दीनी है। इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव आज लोकसभा मांय पूरक सवालां रा जवाब मांय जा जाणकारी दीनी। श्री वैष्णव कह्यो के सट्टाबाजी अर जुआ ऊं जुड्या मामला राज्य सूची रा हिस्सा है अर राज्य सरकार आं सारू विधायी ढांचो बणा सके है।

000

निर्वाचन आयोग आज नई दिल्ली मांय बूथ लेवल अहलकारां—बी.एल.ओ. सारू सिखावण रो कार्यक्रम सुरू कीनो। मुख्य निर्वाचन आयुक्त ज्ञानेश कुमार, चुनाव आयुक्त डॉ. विवेक जोशी सागे दो दिन रा ई सिखावण कार्यक्रम रो उद्घाटन कीनो। ई मौके मुख्य चुनाव आयुक्त कह्यो के इण मांय एक लाख ऊं बत्ता बी.एल.ओ. ने सिखावण दी जावेला।

000

प्रदेश मांय गर्मी रो असर बधतो जा रह्यो है। राज्य रा आतूणी हलकां मांय केई ठोड़ां दिन री बगत तापमान 40 डिग्री सेल्सियस या ऊंचो दर्ज कर्यो जा रह्यो है। बाड़मेर मांय लारला तीन—चार दिन ऊं अधिकतम तापमान 40 डिग्री सेल्सियस ऊं ऊंचो चाल रह्यो है। ई रे अलावा पिलानी अर चित्तौडगढ़ मांय ई गर्मी रो घणो असर महसूस करी ज्यो। मौसम विभाग रे मुजब एक और पश्चिमी विक्षोभ रा असर ऊं जोधपुर अर बीकानेर संभाग मांय आवता 48 घंटां रे दौरान तेज बायरो बाजण बादळा मंड्या रेहवण रा आसार है।

000

उपमुख्यमंत्री दिया कुमारी आज झुंझुनूं रा दौरा सारू पधारी। वे जनता री उदयपुरवाटी ऊं शाकंभरी बीचे सड़क बणावण री मांग परां आ सड़क बणावण रो ऐलाण कीनो।

000

खेलो इंडिया अर खेलो राजस्थान रा तैत प्रदेश रा खिलाड़ियां ने सिखावण देवण रा शिविर लगाया जावेला। राजस्थान राज्य क्रीड़ा परिषद री ओर ऊं 65वां केंद्रीय आवासीय खेल प्रशिक्षण शिविर सिरोही जिला रा माउंट आबू अर जयपुर रा एसएमएस स्टेडियम मांय आवता महीना सुरू कर्या जावेला। आं शिविरां मांय शिरकत करण सारू खिलाड़ियां ऊं अर्जियां मांगी ज्यी है। झुंझुनूं रा जिला खेल अधिकारी राजेश ओला बतायो के आं शिविरा मांय खिलाड़ियां ने करीब तीन हफता ताई सिखावण दी जावेला। ई सारू अर्जियां 25 अप्रैल, 2025 ताई दी जा सके है।

000

प्रधानमंत्री नरेन्द्र मोदी आवता दीतवार तीस मार्च ने आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला। आ मन की बात कार्यक्रम री 120वीं कड़ी व्हेला। ई सारू आप ई 28 मार्च ताई मुफ्त नम्बर **1 8 0 0 — 1 1 — 7 8 0 0** माथे रांय भेज सको हो। ई सागे ई **1922** नम्बर माथे मिस्ड कॉल दे र एस एम एस रे जरिये मिल्या लिंक ऊं ई सुझाव दिया जा सके है। ई रे अलावा नरेंद्र मोदी एप अर माई जीओवी ओपन फोरम रे मार्फत ई सुझाव दिया जा सके है।

000